

四庫全書

集部

欽定四庫全書

集部

劔南詩稿卷四十三

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劔南詩藁卷四十二

宋 陸游 撰

己未冬至

老人畏添歲每歎時序速  
今朝陽始生在易得來復扶  
衰奉先祭拜起賴童僕兒曹亦壽我魚兔隨事足歡言  
為一醉家釀及新熟占年當得稔  
冬至後九日遇  
壬法當有年喜笑  
動鄰曲冀從宿交始載重車折軸明年秋社時處處饜

酒肉

冬至夜坐作短歌

一陽萌生從此日老人堅坐午達夕  
渾渾上沂河流黃赫赫內視神珠赤  
愛如嬰兒未離乳危若遊絲裊千尺  
君不見宣房塞河百萬人一旦橫流由蟻隙

新裁短褐接客以代戎服或以為慢戲作

世事巧相違殘年幸許歸雖云裁免褐不擬出漁扉  
拂石襟靈爽摺節氣力微朝衣猶挂却况遣著戎衣

冬夜

多病睡眠少長閒懷抱清  
昏燈照殘夢寒漏下高城  
落月淡將沒棲禽靜復驚  
誰言冬夜永輾轉已窻明

書感

壯歲功名妄自期晚途流  
落鬢成絲臨風畫角曉三  
弄釀雪野雲寒四垂金鎖  
甲思酣戰地阜貂裘記遠  
遊時此心炯炯空添淚青  
史他年未必知

書意

額霜久矣不勝耘殘髮今年白十分憂國雖忘婆婦緯  
愛君敢進野人芹狀頭酒滴空堦雨爐面香橫出岫雲  
已向人間齊物我不教驚起白鷗羣

試茶

強飯年來幸未衰睡魔百萬要支持難從陸羽毀茶論  
寧和陶潛止酒詩乳井簾泉方徧試拓羅銅碾雅相宜  
山僧剝啄知誰報正是松風欲動時

對酒懷丹陽成都故人

勞生常羨觸髅樂死時却悔生時錯花前有酒不肯狂  
回首朱顏已非昨君看古來賢達人終日飲酒全其真  
世閒萬事竟何有金樽翠杓差關身放翁少日無凡客  
飛觴縱樂皆豪傑清歌一曲梁塵起腰鼓百面春雷發  
故人仙去蓬萊宮鸞絲鳳竹醉春風石帆山下孤舟雪  
一段清愁付此翁

三山卜居三十有四年矣老身七十有五兒輩亦  
頗宜學未為非吉也偶作五字示諸兒

買地不占龜心知百世宜西鄰梅福隱南望項王祠  
菴小偷僧樣陂長按古規保家無異法一念勿萌欺

村興

身老交情見孫生口數添園丁上牛米村婢博蠶鹽  
粬救堆盤白饅饅出釜甜閉門君勿謂衰病正相兼

枕上

迢遞孤村夜淒涼半篆香懷人悲夢短聽雨怯更長  
有術乾盤永無方掃鬢霜高吟擬排悶吟罷更悵悵



得建業倅鄭覺民書言敵亂自淮以北民苦徵調  
皆望王師之至

邦命中興漢天心大討曹風雲助開泰河渭蕩腥臊日  
避揮戈勇山齊積甲高煌煌祖宗業只在馭羣豪

雨夜讀書

農家冬少事無他肆吾勤急雨生新健陳編寄一欣高  
風感革渭善治仰華勲老死今朝夕何由誦所聞

夢中作

已未十二月五日夜  
作所書皆夢中事也

長隄行盡古河濱  
小市人稀霧雨昏  
攪馬垂頭齧菅草  
驛門移路避槐根  
斷碑零落苔俱徧  
漏壁微茫字半存  
催喚厨人燎狐兔  
強排旅思舉清樽

題傳神

雪鬢蕭然兩頰紅  
人間隨處見神通  
半醒半醉常終日  
非士非農一老翁  
捩驥雖存千里志  
雲鵬已息九天風  
嶢嶢骨法吾能相  
難著凌煙劔佩中

紀懷

未斲要離冢畔雲僧牛得食寄鄉粉修身本欲善吾死  
臨事豈忘尊所聞時序管寧親饋奠江山龐老上丘墳  
飾巾家簣從來事萬種悠悠莫苦分

新作柴門戲書

雖設常關果是麼開門終日有誰過從來不省多車轍  
此際真宜置雀羅尚許漁樵時剝啄偶逢風月亦婆娑  
炎炎炙手須臾事也比柴荆較幾何

炊飯

米分齋鉢供薪拾墮巢枝偶爾成幽事欣然慰午飢炊  
時珠瀉甌嘗處雪翻匙欲作明朝計還須賣漉籬

愛閒

今日先生病體輕愛閒猶有舊心情帖看貞觀行間印  
琴記中郎爨下聲衣焙溫溫香欲透雪簷滴滴日初晴  
客來一笑明窓底枉道為農事耦耕

與子聿讀經因書小詩示之

經中固多趣我老未能忘似獲連城璧如傾九醞觴信

能明孔氏何暇傲義皇努力晨昏事躬行味始長

登東山

老慣人間歲月催強扶衰病上崔嵬生為柱國細事爾  
死畫雲臺何有哉熟計提軍出青海未如喚客倒金罍  
明朝日出春風動更看晴天萬里開

已未歲莫

七十六年將到時龍鍾猶復強支持寒燈照影始知瘦  
薄酒作醒方覺衰春日尚能持冷餅花時未擬挿繁枝

癡頑應有傍觀笑自課園丁補槿籬

冬夜讀書示子聿

宦途至老無餘俸貧悴還如筮仕初  
賴有一籌勝富貴  
小兒讀遍舊藏書

又

易經獨不遭秦火字字皆如見聖人  
汝始弱齡吾已耄  
要當致力各終身

又

古人學問無遺力少壯工夫老始成紙上得來終覺淺  
絕知此事要躬行

又

簡斷編殘字欲無吾兒不負乃翁書絕勝鎖向朱門裏  
整整牙籤飽蠹魚

又

聖師雖遠有遺經萬世猶傳舊典刑白首自憐心未死  
夜窗風雪一燈青

又

殘雪初消薺滿園  
糝羹珍美勝羔豚  
吾曹舌本能知此

古學工夫始可言

又

讀書萬卷不謀食  
脫粟在旁書在前  
要識從來會心處

曲肱飲水亦欣然

又

世間萬事有乘除  
自笑羸然七十餘  
布被藜羹緣未盡



閉門更讀數年書

幽興

午倦便高枕朝飢美小食時穿幽圃屐常掩小菴門溪  
憶鷗盟約花迷蝶夢魂餘生猶幾許萬事付乾坤

寓歎

眼底誰為耐久朋倚肩按膝一烏藤虛名但可橫欺日  
薄俗何時復結繩浮世百年悲冉冉間身萬事付騰騰  
年來更歎龍鍾甚欲探梅花病不能

夢題驛壁

十二月二十七日夜

半生征袖厭風埃  
又向關門把酒杯  
車轍自隨芳草遠  
歲華無奈夕陽催  
驛前歷歷堠雙隻  
陌上悠悠人去來  
不為途窮身易老  
百年回首總堪哀

新春

柳淡春初破梅寒瘦  
不禁羈愁醉後減睡思  
雨中深閒試新收硯  
重尋久廢琴何時見  
朋舊細話別來心

庚申元日口號

數行晴日照青鴛春入屠蘇歛灩澦兒報山僧留刺去  
未為無客到吾門

又

黃紬五丈裁衫穩黑黍三升作飯香造物要教無媿怍  
一身溫飽出耕桑

又

南陌東阡自在身老年喜見歲華新洛中九老非吾侶  
且作山陰十老人

又

晚塗初入長生運新歲仍當大有年  
剩與鄉鄰同覓醉  
市樓酒賤不論錢

又

去年迎客已蹒跚今歲入扶出亦難堪  
笑此翁衰到底  
重裘絮帽尚言寒

又

仁和館外列鷗行憶送龍舟幸建康  
舍北老人同甲子

相逢揮淚說高皇

視東臯歸

抱耒新湖薊燒畬古廟孺官遊悲翫  
歸臥困沈綿日  
隱鴉啼戍舟回落鴈天衰殘知迫死  
不忍負青編

晚步舍東

遇興穿叢竹尋香折野梅  
莫天寒欲雪幽徑綠生苔  
栖  
雀爭枝噪歸牛並塹來  
高城角聲動不盡古今哀

入日東園

歲首未入春風氣已稍和我睡意慵起如此鳴禽何駕  
言之東園落梅亦已多江南無堅冰綠池生微波挹彼  
葡萄醅酌我鸚鵡螺雖無絲與竹倚樹自高歌矯首東  
南望稽山鬱嵯峨兒曹幸力穡老子得婆娑

逆旅行

古者謂死為歸入此身未死均是客家為逆旅身在途  
久寓遽歸初不擇逆旅相看隨薄厚非意相干寧足責  
世間何處無谿山得酒盡醉當墮幘傍觀嘲誚亦其宜

東海定非蟲可測

小雨初霽

歸來偶似老淵明消渴誰憐病長卿  
小雨染成芳草色

好風吹斷畫簷聲剪燈院落晨猶冷  
賣酒樓臺晚旋一作

放晴莫道此翁遊興嬾蘭亭禹一作蕭寺已關情

獨夜

村路泥淹雪虛簷水結冰長征荷戈客  
暫到打包僧妖鵬鳴高樹飢鼯觸闌燈  
誰能問良苦衰病正相乘

忍窮

短褐財遮骨孤烟僅續炊久窮方有味古語不吾欺堅  
坐忘昏旦殘年迫耄期尚餘書滿屋手校付吾兒

開歲半月湖村梅開無餘偶得五詩以烟濕落梅

村為韻

斷岸通別浦孤舟入春烟與梅本無期忽到醉眼邊折  
花挿紗帽花重覺帽偏居人空巷看疑是湖中仙

又



我來梅花村倚杖久佇立惜哉風雨餘零落綠苔濕往  
年賦詩人去袂不可執明朝梅亦空感舊百憂集

又

梅花如高人妙在一丘壑林逋語雖工竟未脫纏縛乃  
知尤物側天下無傑作老我懷不紓樽前幾開落

又

斗柄忽東指開盡湖邊梅偉觀天下無四顧雪千堆時  
至當斂退勿受曉角催安知桃李輩於子無嫌猜

又

昨日春已來  
盎盎滿江村  
落梅亦多情  
點點浮清樽  
語離聊一醉  
不恨村酒渾  
人生共如此  
已矣兩忘言

老病

湖上歸耕一老翁  
此心非復少年同  
讀書初恨歲時速  
聞道始知身世空  
匠石不能材社櫟  
弋人何意慕冥鴻  
新春愈覺支離甚  
又付生涯藥餌中

三二年來夜夢每過吾廬之西一士友家觀書飲

酒方夢時亦自知其為夢也

西鄰好友工談笑每見明知是夢中樽酒不空書滿架  
何時真得與君同

又

清言疊疊岸綸巾久矣吾遊無若人自怪夢中來往熟  
抱琴攜酒過西鄰

上元雨

城中酒壚千百所不憂不售惟憂雨今年上元燈滿城

曲巷深坊鬧歌舞天公不借一日晴風吹燈死雨如傾  
家家移牀避屋漏不聞人聲聞屐聲

雜興

造物乘除理固然許將窮悴博頑堅驥衰伏櫪心千里  
龜冷搗牀壽百年好事時供沽酒費擁途爭笑插花顛  
漁村宿願雖償盡猶恨僧房欠晝眠

又

散髮林間萬事輕夢魂安穩氣和平只知秋菊有佳色

那問荒雞非惡聲達士招呼同嘯傲福人分付與功名  
一篇悟盡逍遙理始信蒙莊是達生

初春書喜

我生未癡絕萬事不繫懷一朝蛻形去豈問棄與薶遊  
宦三十年所向無一諧偶然有天幸自退非人排黃紙  
如鴉字君恩賜殘骸刻溪回雪舫雲門散青鞵兩犢掀  
春泥一鉢隨午齋更當擁布被高枕聽鳴蛙

幽居無一事戲作

長鬚僅有玉川奴  
禿尾猶無漫漢驢  
萬事已隨春枕斷  
故人何啻曉星疎  
出乘微雨鉏畬粟  
歸傍荒畦擷野蔬  
一字不看方睡美  
任人搜去帳中書

贈道流

烟雲深處作生涯  
回首人間歲月賒  
留得朱顏憑綠酒  
掃空白髮賴丹砂  
七絃指下泠泠久  
雙袖風中獵獵斜  
他日相尋不知處  
會從漁父問桃花

病中作

牀席呻吟裏衡茅隱約中空興年往歎未著日新功世  
遠言猶在身危道豈窮但能無媿怍天地本來公

病愈偶書

枯蓬萬里寄飄風晚落江頭號放翁冉冉流年秋鏡裏  
悠悠殘夢曉笳中掃除藥裏病良已棄置酒杯愁自空  
閒處固應容老子卧看年少起新豐

小圃獨酌

少時裘馬競豪華豈料今為老圃家數點霏微社公雨

兩叢閒淡女郎花詩成枕上常難記酒滿街頭却易賒  
自笑邇來能用短只將獨醉作生涯

飯罷戲示鄰曲

今日山翁自治厨嘉穀不似出貧居白鵝炙美加椒後  
錦雉羹香下豉初箭茁脆甘欺雪菌蕨芽珍嫩壓春蔬  
平生責望天公淺捫腹便便已有餘

春日

開盡梅花柳漸青東風又滿會稽城放翁晨起有佳思



姪姁林鶯初試聲

又

方池潏潏碧波平  
曲徑纖纖細草生  
席地幙天君但醉  
苦無多日是清明

又

桃花輕薄柳花狂  
蛺蝶翩翩燕子忙  
惟有龜堂無一事  
閉門白日不勝長

又

巷口東風吹酒旗，老人也惜早春時。  
雨來三日泥沒踝，過盡梅花渾不知。

又

雪山萬疊看不厭，雪盡山青又一奇。  
今代江南無畫手，矮牋移入放翁詩。

又

怕見公卿嬾入城，野橋孤店跨驢行。  
天公遣足看山願，白盡髭鬚却眼明。

新晴野步

吹盡浮雲旋作晴  
郊原高下水縱橫  
烟蕪漫漫如添色  
谷鳥關關已變聲  
迨酒賤時須痛飲  
得人扶處儘閒行  
隔湖遙指蘭亭路  
鄰叟追隨羨眼明

湖上作

鵝兒涇口曉山橫  
蜻蜓港頭春水生  
蘭亭之北是茶市  
柯橋以西多舫聲

又

東涇西涇花極望紅雲照波錦裏山路似掌平身自倦  
酒如土賤篋常慳

夜行過一大姓家值其樂飲戲作

村豪聚飲自相歡燈火歌呼鬧夜闌醉飽要勝飢欲死  
看渠也復面團團

枕上作

水漲池新滿山寒屋儘低愁多憎夜雨睡少喜晨雞社  
肉初分昨春燕已再犁明朝尋父老不怕蹋街泥

又

山雨蕭蕭過沙泉咽咽流夢中無遠道醉裏失孤愁貧  
賁相如騎寒思季子裘兒童報新霽裹飯出閒遊

悽悽行

悽悽重悽悽惻惻復惻惻我媿思曠傍人誰子思惻興  
邦在人材巖穴當物色如何清廟器老死山南北小儒  
雖微陋一飯亦憂國豈無一得愚欲獻懼非職

春薺

食案何蕭然春蔣花若雪從今日老硬何以供采擷山  
翁垂八十忍貧心似鐵那須萬錢筋養此三寸舌輒炊  
香杭飯幸免煩祝噎一瓢亦已泰陋巷時小啜

答客

人生各有營為吏最無策其間小黠者但肯乘下澤絕  
筆光範書掃跡翹才客早收畏塗身未老歸阡陌嗟予  
昧澤術誤計真累百衰病始知悔泯默每自責孤舟寄  
渺莽尚恨江湖迓客來勿多談窮命不禁嚇

閒中自詠

小艇上時皆綠水  
短筇到處即青山  
二十四考中書令  
不換先生半日間

又

聲名本自不關身  
富貴元知與禍鄰  
但恨平生閒不足  
再來真作卧雲人

甲申雨

老農十口傳為古  
春遇甲申常畏雨  
風來東北雲行西

雨勢已成那得禦山陰  
洙湖二百歲坐使膏腴成瘠鹵  
陂塘遺迹今悉存歎息當官誰可語  
甲申畏雨古亦然  
湖之未廢常豐年  
小人那知古來事  
不怨豪家惟怨天  
今歲遊花涇  
差晚戲作

滿地殘紅點綠苔  
花涇弭棹小徘徊  
春風又作忽忽別  
老病無端滾滾來  
亦悟百窮緣骯髒  
終羞萬事學低摧  
吾文自欲忘憂耳  
那博人間水一杯

枕上口占



五十年前詩酒身山陰風月尚如新閒愁已是無  
一枕春寒更惱人

又

蹋雨敲門覓季夷襍牋同和仲高詩回思五十年前事  
恰似今宵夢裏時

又

五十年間萬事空嬾將白髮對青銅故人只有飛花在  
惆悵無情一夜風

贈謝正之秀才

君家麻源第三谷我在鏡湖分一曲平生夢亦不相接  
忽然懷中瀉珠玉誠齋老子主詩盟片言許可天下服  
長歌為君定聲價賞音但須一夔足蹋泥過我君豈誤  
拱壁何至求凡目只愁明日遽來索北窻連夜挑燈讀  
連日往來湖山間頗樂即席有作

晚春光景亦佳哉野老蒼顏一笑開莫問此生猶幾屐  
但知相遇且銜杯偶携兒女祈蠶去又逐鄉鄰賽麥回

不信年華如轉轂城頭君聽角聲哀

贈猫

鹽裏聘狸奴常看戲座隅時時醉薄荷夜夜占羶榆鼠  
穴功方列魚食賞豈無仍當立名字喚作小於菟

歎老

小築依林藪殘年迫耄期衣寬方覺瘦步蹇始悲哀食  
飲常多忌方書動自隨園花幾分在睡起問吾兒

殘春

章甫從諸老今為兩世人惟書尚開眼非酒孰關身遠  
水涵清鏡晴雲感細鱗籬邊花未盡作意醉殘春

東村

雨霽山爭出泥乾路漸通稍從牛屋後却過鶴巢東決  
沙溝水翻翻麥野風欲歸還小立為愛夕陽紅

晚步舍北歸

昨日海棠開今朝燕子來偶行沙際去却傍柳陰回酒  
是治愁藥書為引睡媒吾生不乏此外物信悠哉

記夢

夜夢遊名山翠壁開巖扉主人喜迎客劇談皆造微下  
臨萬里空渺渺一鶴飛安得棄家去丹竈常相依

寄題揚州九曲池

清汴長淮莽蒼中揚州畫戟擁元戎南連近甸觀秋稼  
北撫中原掃夕烽茶發蜀岡雷殷殷水通隋苑月溶溶  
懸知帳下多豪傑一醉何因及老農

投老

投老百無成山林送此生薄才元易盡古道竟難行陋  
巷牛羊迹衡門鳥雀聲新年幸差健作意事春耕

茅亭

終日坐茅亭蕭然倚素屏兒圓點茶夢客授養魚經馬  
以鳴當斥龜緣久不靈詩成作吳詠及此醉初醒

貧甚賣常用酒杯作詩自戲

桃李成塵渾不數海棠也作臙脂雨清明未到春已空  
枝上流鶯替人語逢春日日合醉歸莫笑典衣窮杜甫

生時不肯澆舌本死後空持酹墳土門前三百里湖光  
天與先生作醉鄉銀杯羽化不須歎多錢使人生窟郎

春晚泛湖歸偶賦

十日雨晴湖水深暖催新綠上橫林分泥海燕穿花徑  
帶犢吳牛傍柳陰夏近漸低遊舫價日斜殊費寺樓吟  
歸來支枕還無事一縷微烟看水沈

劔南詩藁卷四十二



欽定四庫全書

劔南詩藁卷四十三

宋 陸游 撰

東園小飲

少年萬里走塵埃歸卧柴荆晝不開  
十事真成九敗意一春知復幾銜杯  
波清憑檻觀魚樂風緊鉤簾待燕回  
催喚比鄰同晚酌旋燒笙筍摘青梅

又

入東又見幾春風  
茆屋蘆簷寂寞中  
道業雖如詩不進  
世緣已與夢俱空  
高枝濯濯辛夷紫  
密葉深深躑躅紅  
村巷斷無軒蓋到  
一樽猶得伴鄰翁

又

三月園林日漸長  
閒從鄰曲答年光  
醪醕獨殿羣芳後  
醺醖能令萬事忘  
下豉尊羹誇舊俗  
供鹽梅子喜初嘗  
烏靴席帽知何樂  
自古京塵眯眼黃

又

乞得殘骸老故山  
草亭終日對孱顏  
孤雲百尺起江際  
幽鳥數聲鳴竹間  
衆死一身今獨健  
人忙萬物本常閒  
此心欲語知誰聽  
賴有漁樵日往還

病退頗思遠遊信筆有作

平日身如不繫舟  
曾從楚尾客秦頭  
風生江浦千帆曉  
月落山城一笛秋  
萬事只能催白髮  
百年終是臥荒丘  
扶衰強項君休笑  
尚憶人間汗漫遊

春晚閒步門外

病退扶行力尚微悠然隨意出荆扉蜂貪釀蜜爭花去  
燕喜分泥傍水飛午渴坼瓶嘗煮酒晴暄開筇換單衣  
躊躇已久歸猶嬾更向溪頭坐釣磯

嘲布穀

時令過清明朝朝布穀鳴但令春促駕那為國催耕紅  
紫花枝盡青黃麥穗成從今可無語傾耳舜絃聲

題齋壁

出郭無十里結廬纔數間每將窮博健不遣樂妨閒賣

藥雲邊市尋僧雨外山何妨搖櫂去却作跨驢還

龜堂晚興

九日春陰一日晴回塘閒院愜幽情  
小魚出水圓紋見輕燕穿簾折勢成  
今日掩關真佚老向來涉世亦遺名  
巡簷更有欣然處新筍初抽四五莖

長干行

裊腰綠如草衫色石榴花十二學彈箏十三學琵琶寧  
嫁與商人夫婦各天涯朝朝問水神夜夜夢三巴聘金

雖如山不願入侯家郭  
袖庭花下東風吹鬢斜

養生

受廬故里老為氓  
三十餘年學養生  
倩盼作妖狐未慘  
肥甘藏毒醜猶輕  
忠言何啻千金藥  
赤口能燒萬里城  
陋巷藜羹心自樂  
傍觀虛說傲公卿

園中觀草木有感

木筆枝已空  
玉簪殊未花  
蘋桐時更晚  
春盡始萌芽  
老人多感慨  
俯仰悲歲華  
兩曜如犇輪  
疾去不可遮  
城頭

挿雙旗疊鼓催清笳兀然一室間不復過鄰家午睡或  
至莫亂髮垂髣髴所嗟瘦僧死莫致茶山茶茶山僧道省歲餉新

茶今死已再歲矣

### 恩賜龜紫

憶昔青衫上赤墀額間未有一莖絲豈知晚拜金龜賜却  
是霜髯雪鬢時

又

已挂朝衣神武門暫紆紫綬拜君恩兒孫賀罷還無事

雨笠煙蓑自灌園

自警

少年不自量妄意慕管葛晚節雖知難猶覲終一豁悲  
哉老病馬解縱誰復秣既辭筆轡勞始愛原野濶飲澗  
齧霜管亦可數年活勿復思長途嘶鳴望天末

獨夜

一生食太倉蠹耗均雀鼠雖云久置散飢飽尚撐拄兩  
年失微祿始覺困羈旅傾身營薪米得食已過午人觀



不堪憂意氣終自許藜羹若大庖草廬如萬礎平生師  
顏原本自貌晉楚悠然卧北窻殘燈翳還吐

雨夕枕上作

鬢毛日夜雪霜稠冉冉年光逝肯留酒力但資愁作崇  
雨聲偏與睡為仇銘旌官職眼前事史冊姓名身後憂  
畢竟此生何處是江湖萬里有孤舟

喜晴

澤國風雨多春盡尚裘褐閉門不能出飽食鳩婦聒今

朝雲忽歸溝水清活活偶為東園行魚鳥間何闊婦女  
驚事終桑柘光如潑布穀汝勿憂吾袴真可脫

觀運糧圖

王師北伐如宣王風馳電擊復土疆中軍歌舞入洛陽  
前軍已渡河流黃馬聲蕭蕭陣堂堂直跨井陘登太行  
壺漿簞食滿道傍芻粟豈復煩車箱不須絕漠追敗亡  
亦勿分兵取河湟但令中夏歌時康千年萬年無餽糧  
宇文弼臣吏部予在蜀日與之遊至厚契濶死生

二十年矣庚申三月忽夢相從如平生愴然有

賦

英姿爽氣宇邛州雖古人中豈易求六月長途將暍死  
一天風雹起龍湫

阿姥

城南倒社下湖忙阿姥龍鍾七十強猶有塵埃嫁時鏡  
東塗西抹不成粧

初夏

雨足移秧後風和剝繭初昏昏時就枕貿貿却尋書晚  
步身須杖屨興髮廢梳滿城車馬客誰復問如何

讀書

稽古衰猶力翻書夜達晨思人頻掩卷感事忽霑巾世  
閱幾春夢身今一老民忍窮端已慣疏食又經旬

喜晴

江湖春莫多風雨點滴空堦實厭聽剝喜今朝有奇事  
一窻晴日寫黃庭

初夏北窓

作墨無聲紫玉池年光又入放翁詩  
風和柳岸吹綿後雨足瓜畦引蔓時  
病酒相如無奈渴清言叔寶不勝羸  
此生豈復功名事付與城頭畫角悲

又

水際柴荆晝不開臥聽微雨雜輕雷  
春蠶滿箔眠初起社燕爭巢去復來  
海檜屈蟠依怪石山榴零落點蒼苔  
一樽及此風光美車下長坡底用推

書適

老人去健羨飯足便有餘此外一壺酒薦以園中蔬手  
種數畦花時開一編書近者苦足蹇復營一柴車時時  
訪溪父亦或遊僧廬上下山澤間視身等禽魚既歸則  
浩歌幽抱亦少攄一笑謂兒子不須起犂鋤

幽居初夏

路繚長隄北家居小市西陂塘晨飲犢門巷午雞鳴婦喜

蠶三幼

鄉中謂蠶眠為幼

兒誇雨一犁衰翁亦放浪未怕屐霑泥

又

梅塢青黃子草陂紅紫花雙鵝朝戲浦羣鴨莫還家赤  
脚挑殘筍蒼頭摘晚茶出門逢野老滿意說桑麻

又

詰曲穿桑徑謳啞響竹門疏泉灌藜莧倚杖牧雞豚江  
步橫新舶茅簷弄幼孫太平端有象誰與畫吾村

又

大耋光陰短南記日月長松枯宜倒壑龜老慣撐牀寂

寂三升稷悠悠百本桑飢寒猶骯髒何術砭吾盲

獨醉

老伴死欲盡少年誰肯親自憐真長物何啻是陳人江  
市魚初上村場酒亦醇頽然北窻下不覺墮紗巾

獨立

午醉初醒後回廊獨立時斜陽明雨葉乳鵲裊風枝違  
俗雖堪笑師心頗自竒傍人疑徙倚向道是尋詩

高卧



省戶歸來不計年悠然高卧鏡湖邊  
鉤簾每對千峯雨接竹新分一脈泉  
學問誠身元有道阨窮知我豈非天  
虛名自古能為累正恐人看直一錢

趙彥膚修撰挽辭

朝路英聲早宗盟宿望尊  
讌談推醞藉大筆擅雄渾  
許國心猶壯安邊策具存  
悽涼故時客痛哭望秋原

讀香奩集詩戲效其體

金鋪一閉幾春風咫尺心知萬里同  
麝枕何曾穰夢惡

玉壺空解貯啼紅畫愁延壽丹青誤賦欠相如筆墨工  
一事目前差自慰月明還似未央中

野步至村舍莫歸

草徑盤紆入廢園漲餘野水有殘痕新蒲漫漫藏孤艇  
茂樹陰陰失近村拄杖敲門求小憩老盆盛酒瀉微渾  
興闌却覓橋邊路數點歸鴉已帶昏

述悲

屏居不出門終歲袖手坐但怪意氣衰那覺日月過故

人為冢丘老伴餘幾個天高鬼神惡回天夷齊餓遺魂  
一零落豈復聞楚些且當醉濁醪吾夢行亦破

江東韓漕晞道寄楊庭秀所贈詩來求同賦作此  
寄之

三朝巍巍韓侍中爛然彝鼎書元功西戎北狄問安否  
九州萬里涵春風子孫繼踵皆將相我猶及拜西樞公  
顧憐通家略貴賤勞問教誨均兒童西樞有孫又奇偉  
凜然太華摩蒼穹小試玉節江西東文書如海到手空

政成蒲鞭亦不用地上錢流倉粟紅君持此手上廊廟  
折衝禦侮知從容桑乾不勞尺箠下榆關正可九泥封  
却歸故里訪遺老應記山陰九十翁

雨夜

麥熟家家喜墮涎龜堂依舊突無烟雨中更覺淒涼甚  
一點殘燈守蠹編

小橋

漠漠輕陰隱隱雷石榴半落點莓苔小橋西北闌干角

獨岸綸巾待雨來

自笑

三間茅屋寄滄浪  
鳥出樊籠馬脫韁  
濫濫陂塘秧水滿  
陰陰門巷麥風涼  
蔬盤旋采溪毛滑  
篷艇新編露箸香  
捐盡浮名方自喜  
一生枉是伴人忙

入梅

微雨輕雲已入梅  
石榴萱草一時開  
碑償宿諾淮僧去  
卷錄新詩蜀使回  
墨試小螺看斗硯  
茶分細乳玩毫杯

客來莫笑兒嬉事九陌紅塵更可哀

雨夜

小雨收仍落孤燈翳復明  
衰殘書易忘憂患夢多驚  
熠燿矜暗翻翻雀轉更閉門行  
老死亦足慰平生

燕

初見梁間牖戶新  
銜泥已復哺雛頻  
只愁去遠歸來晚  
不怕飛低打著人

午枕

茅簷一杯淡藜粥有底工夫希鼎餽書中至味人不知  
雋永無窮勝梁肉老夫享此七十年每媿天公賦予偏  
清泉洗黼煎山茗滿榻松風清晝眠

項里觀楊梅

山前五月楊梅市溪上千年項羽祠小繖輕輿不辭遠

年年來及貢梅時

鄉俗謂楊梅止曰梅

又

隔歲租園不計錢楊梅海裏過年年癡人只競聞名利

那信三山是地仙

又

溪流曲曲樹陰陰人語烟中覺塢深把定山僧同一笑  
明年强健更相尋

又

山中戶戶作梅忙火齊驪珠入帝鄉細織筠籠相映發

華清虛說荔枝筐

鄉俗謂選擇  
楊梅為作梅

夜歸



城角傳三弄桑村喜獨歸  
雨多螢滿野徑狹露沾衣食  
儉鹽醯薄年衰氣力微  
青燈對兒女撫事一歔歎

五月十一日睡起

病眼慵於世事開  
虛堂高卧謝氛埃  
簾櫳無影覺雲起  
草樹有聲知雨來  
茶碗嫩湯初得乳  
香篝微火未成灰  
脩然自適君知否  
一枕清風又遇梅

示客

世間可笑走踈踈  
誤認虛空作汝身  
已覓微名潤枯骨

更謀厚積遺何人風旛畢竟非心境瓦礫何妨是道真  
新藕出泥瓜上市為君一醉墮紗巾

雨中作

雨聲一滴不肯住客夢欲成還自驚白水陂邊破茅屋  
亂書堆裏老儒生出行豈復有流輩未死尚能躬釣耕  
十日無魚亦何歎新菰亦可配吳杭

旬日來溪水泛  
溢魚不可得

舟中遣興

湖海渺雲濤浮家得養高方牀展蘄簟短褐束鄙條酒

裏亦何好人間聊可逃  
酣歌拖樓底萬事一秋豪

自嘲

少讀詩書陋漢唐  
莫年身世寄農桑  
騎驢兩脚欲到地  
愛酒一樽常在傍  
老去形容雖變改  
醉來意氣尚軒昂  
太行王屋何由動  
堪笑愚公不自量

齋中雜興十首以丈夫貴壯健  
慘戚非朱顏為韻  
成童入鄉校  
諸老席函丈  
堂堂韓有功  
英槩今可想  
從父有彥遠  
早以直自養  
始終臨川學  
力守非有黨  
紛紛

名他師有泚在其類二公生氣存千載可畏仰

又

士生學六經是為聖人徒處當師顏原出當致唐虞斯  
文陣堂堂臨敵獨援枹異端滿天下一掃可使無乃知  
立事功先要定規模彼雖力移山安能奪匹夫

又

公議在天下如人有元氣平居失護養一旦可勝諱神  
丹卒難求百疾起如蝟奄奄息僅屬熟視吁可畏大義

在春秋遺跡悲漢魏君看徐孺子底物視富貴

又

昔我自蜀歸耆舊已凋喪後來二三公尚慰天下望千  
里一紙書慇懃問亡恙嗚呼亦已矣遺語寄悲愴我亦  
迫桑榆便恐無輩行夜窻對青燈力憊心尚壯

又

餘齡垂八十雖憊猶強飯正如老病馬風沙時一噴玉  
關渺何許道里何啻萬目中堠歷歷欲進不能寸矯首

望秋空徒羨霜鵲健狸骨亦何悲吾非麒麟擅

又

琅琅誦詩書尚記兩髦髫誰料七十年沈滯終坎窞炊  
突映茅蘆日暮烟慘慘忍窮端已熟撫事空自感狂言  
悔噬臍衆訾驚破膽尚有愛書心還如嗜菖歎

又

去國已酉冬忽見十頌厯衰殘口兩齒困阨家四壁時  
看溪雲生飽聽簷雨滴悠然度寒暑何處著欣戚幽人

豈知我月夕聞吹笛何當五百歲相與摩銅狄

湖中風月佳時

每聞笛聲異甚莫知何人意其隱君子也

又

扁舟東下硤日月去若飛當時筆硯舊久已晨星稀俊  
逸如伯渾簡諧如知幾天高鬼神惡回首萬事非我欲  
泝黃牛買屋居青衣九原不可作哀哉誰與歸

又

荷鉏草堂東藝花二百株一朝春風來白白蕪朱朱南

列紅薇屏北界綠芋區偃蹇雙松老森聳萬竹臞餘地  
不忍第挿援引瓠壺何當拂東絹畫作山園圖

又

閒居寂無客柴門晝長闌孤舟小於葉放浪烟水間樹  
暗揚梅村露下白蓮灣釣魚樵風涇買酒石帆山向來  
支許輩恐亦無此閒道逢若耶叟握手開蒼顏

夏五月方閑雨忽大風雨三日未止

海風一夕狂拔木山雨三朝猛穿屋向來望雲眼欲枯



雨甚還憂敗嘉穀今年旱勢連吳中吾州乃獨勞神龍  
稽首龍公要斟酌收雲歸山水歸壑

又

五月晝晦天欲雨街中人面不相覩風聲撼山翻怒濤  
雨點飛空射强弩一雨三日姑可休龍其玩珠歸故湫  
千里連雲慶多稼牲肥酒香作秋社

遣興

外物元知等一塵浮生何事最關身江山好處得新句

風月佳時逢故人有酒一樽聊自適藏書萬卷未為貧  
聖賢自古無知命君看居東與在陳

又

老向人間怯路岐感今懷昔不勝悲詩無傑思知才盡  
酒有殘杯覺氣衰縣郭燈疎尋店夜津亭雨細待船時  
筋骸尚給春耕在便買烏犍亦未遲

六月一日曉賦

視夜明星高蟬聲滿庭樹殘骸幸差健散髮穿雨屨巖

扉手自開曳杖得徐步碧瓦浮青煙園荷瀉殘露草木  
無俗姿雞犬共幽趣兒來問晨炊一笑揮使去

露坐

泠泠野水赴橫塘坐久松風入髮涼月淡星疎天欲曉  
未妨清嘯倚胡牀

夜賦

月暈知將雨風聲報近秋暗廊行熠燿深樹嘯鳴鵯老  
幸傳家事狂猶為國憂相齊雖已矣且復飯吾牛

乙夜納涼

幽人新製葛衣成  
二寸藤冠覺髮輕  
淨掃中庭延月色  
緩拖拄杖聽蟬聲  
微涼便欲踈紈扇  
小醉何妨倒玉罍  
八尺風漪真美睡  
故應高枕到窻明

五鼓

夢斷華胥夜艾時  
遠廊蕭散曳筇枝  
長空漸見明河落  
短調猶殘畫角吹  
世事又隨朝日出  
釣船莫負早秋期  
南湖五畝新菰熟  
此味惟應老子知

老態

齒如強留客雖住無久理目如新募兵臨敵烏可使齒  
廢踈梁肉目澀屏書史浮世真幾何老態遽如此啜粥  
習安坐用短亦自喜作詩記吾衰聊用調穉子

枕上聞風鈴

毒暑今年倍故常蟲聲四合欲舁牀老人不辦搖團扇  
靜聽風鈴意已涼

又

流汗沾衣熱不勝饒蚊乘勢更縱橫夢回忽覺南風起  
時聽錚然一兩聲

寄贈湖中隱者

高標絕世不容親識面無由况卜鄰萬頃烟波鷗境界  
九秋風露鶴精神子推綿上終身隱叔度顏回一輩人  
無地得申牀下拜夜聞吹笛度烟津

觀畫山水

古北安西志未酬人間隨處送悠悠騎驢白帝城邊雨

挂席黃陵廟外秋  
大網截江魚可膾  
高樓臨路酒如油  
老來無復當年快  
聊對丹青作卧遊

六月十八日立秋未旦起行山園口占

北斗離離柄漸西  
披衣出戶聽晨雞  
豈惟蒲柳先搖落  
坐覺風雲已慘悽  
斷簡不妨重料理  
清樽隨處可提携  
穿林莫惜衣沾露  
爽徹靈臺勝寶犀

新秋

衰髮成絲奈若何  
更堪日月疾飛梭  
梧桐敗葉飄猶少

蟋蟀雕籠賣已多歲樂喧呼沽酒市夜涼悽斷采菱歌  
老夫亦動秋風興欲倩鄰翁買釣蓑

晨起自山園歸書室

世事苦紛紛村墟寂不聞穿林拾蟬蛻隔浦數鷗羣  
搖落初飄葉高春未散雲歸來書滿眼猶足肆吾勤

初秋小雨

雨來一洗肺肝熱風過遠吹禾黍香誰識山翁歡喜處  
短檠燈火夜初長



出遊

舉世誰能伴我閒  
出遊隨處一開顏  
繫船扛鼎將軍廟  
秣蹇流觴內史山  
小市況經搖落後  
高城回望莽蒼間  
歸來燈火湖塘晚  
指點柴門未上關

對酒

平生但信緣作計  
每不審春炊官倉粟  
一飽輒甘寢二年棄微祿  
溝壑方慄慄藜羹闕鹽酪  
豆飯雜沙礫偶然  
餓不死得酒猶痛飲  
捩回瀝瀝施喚省邯鄲枕

自勉

曩歲讀隱書妄意慕陶葛芝房及乳石日夜躬采掇飛  
舉固未能死籍或可脫那知事大謬髮齒將禿豁神仙  
豈棄汝正坐自迂闊餘年尚努力勿待燭見跋

新涼

初卷含風八尺漪井桐已復不禁吹蟬聲未用催殘日  
最愛新涼滿袖時

醉中題民家壁

壯歲羈遊厭故棲暮年却愛草堂低  
交情最向貧中見  
世事常於醉後齊  
松吹颼颼涼短髮芒屨策策響新泥  
吾詩戲用寒山例小市人家到處題

秋景

雨泣蘋花老風搖稗穗長  
昏林喧宿鳥秋院咽啼蜚  
舊學成迂濶初心墮渺茫  
顏齡尚餘幾誰與問蒼蒼

舟中作

會稽城上角鳴鳴  
日落烟村暝欲無  
千載虛名笑張翰

一官元不直尊鱸

雜興

足弱僅能行  
齒搖常欲墮  
扶持賴藥物  
苟幸一日過  
事來強訓答  
其實惟欲卧  
平生許文休  
歲晚依馬磨

又

蘭臺遺漆書  
汲冢收竹簡  
辛勤萬卷讀  
不負百年眼  
園座浩縱橫  
挿架高巉巖  
一笑顧吾兒  
銀艾何足綰

又

壽年本偶爾亦與富貴同一日復一日遂作八十翁几  
杖稱大耋貂蟬號三公信手忽成盧孰為拙與王

又

少年豈知酒借醉以作狂中年狂已歇始覺酒味長湛  
湛癭樽綠酌以紅螺觴醒醉不可名兀坐萬事忘

自咏閒適

殘年鄰曲幸相依真似遼天老鶴歸荷浦未疎魚正美

鄉俗謂夏秋魚  
為荷葉下魚

豆畦欲暗雉初肥款門路近時看竹送

酒人多不典衣最喜夕陽閒望處數家垣屋鎖煙霏

近村暮歸

莫笑山翁雪鬢繁歸休幸出上恩寬  
黷樽恰受三升醞

龜屋新裁二寸冠

黷樽即皮囊美所云訶陵樽也  
予近以龜殼作冠高二寸許

僧閣

鬻茶同淡話漁舟投釣卜清歡  
還家欲作諸孫贈村路

累累柿未丹

秋興

扶衰又見素秋過未死其如造物何  
破屋頽垣那敢議

濁醪粗飯已為多佩刀但可償黃犢作字安能博白鵝  
龜紫拜恩如夢寐殘年其實一漁蓑

讀史有感


不肯低頭就世事亦不作牋與天公惟須痛飲以醉死  
亂山深處聽松風

又

昔人識不過十字富貴封侯渠自如龜堂閉門萬卷讀  
一字不肯供時須

又

蘇門長嘯不可親  
鹿門采藥更絕塵  
老死故山雖自許  
掩書未免媿斯人



劔南詩藁卷四十三



# 欽定四庫全書

集部

劔南詩稿卷四十五

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劔南詩藁卷四十四

宋 陸游 撰

讀何斯舉黃州秋居雜詠次其韻

造請非所長一帶每嬾束揖客雖小殊亦未勝僕僕正  
須駕柴車歸藝東籬菊故山甘水泉羣飲友麋鹿百年  
不堪玩萬事要自燭小人欺屋漏吾輩當戒獨

又

少從長者遊麤聞聖入道日食雖一簞頗覺顏色好辛  
勤五十年猶秉後凋操風俗日已移令人惡懷抱紛紛  
堪一咍驕我以旗纛豈知江湖間世襲散人號

又

全家寄舴艋結茅非始謀江市得煙蓑不博千金裘道  
散俗日薄老聃出衰周治身去健羨如稼必去蠹吾身  
一隙塵斯世一客郵君能通其說生死真浮休

又

衆星麗長空惟月最為傑  
我大圓鏡粲粲白玉玦  
穿林散珠璣入戶凜霜雪  
世方喜繁華我獨慘不悅  
清光真可友肝肺冰欲結  
彼哉市朝人恣慾生內熱

又

夜靜我欲歌四座且勿喧  
堯舜本得道富貴何足捐  
聖人久不作學者墮語言  
著書各專門百家散如烟  
一身有不知况察魚與鳥  
安得天下士相與明忘筌

又

古人處丘園如彼不嫁女終身秉大節敢恨老環堵嗟  
予晚乃覺乞骸歸卒伍去就講已熟穴居宜知雨百尺  
持汲綆道長畏天暑先見雖有慙愛身亦自許

又

賦性本剛褊直欲棲深山晚乃稍悔悟自恨不少寬胡  
越本一家禍福環無端少忍萬事畢孰為熱與寒我友  
為我言冠蓋滿長安人人不如君八十猶朱顏

又

倚牆有鉏耨當戶有杼軸雖云生產薄桑麻亦滿目況  
承先人教藏書令汝讀求仁固不遠所要念念熟喟然  
語兒子勿媿藜苲腹亦勿慕虛名守此不啻足。

又

人生天壤間出處本異趣釋耒入市朝徒失邯鄲步昔  
人亦有言刻足以適屨奈何不自反忽已迫霜露我躬  
尚不閒況為子孫慮歲晚故山寒地爐可煨芋

又

少年去國時不忍輕出晝晚歸補省郎但覺慚列宿人  
豈不自揣幸矣老雲岫知止詎敢希要且避朝詒誰將  
有限身遺臭古今宙人誅雖或逃陰陽將汝寇

讀蘇叔黨汝州北山雜詩次其韻

暑耘日炙背寒耕泥沒脚衆人占膏腴我獨治磽确力  
盡功未見厥土但如昨豈惟窘糠粃直恐轉溝壑今年  
雨暘時天如相耕穫屋傾未暇扶且復補籬落

又

舊絮補破襦生薪續微火惻孤有凍死自視亦已過鄰  
翁冒風雪斗酒持飲我尖團擘霜蟹丹漆釘山果欣然  
共笑語何止寬寒餓布被擁更闌招魂不須些

又

三山鏡湖上出郭無十里結廬非所擇但取便薪水間  
亦出從官安能慕園綺地主卜林塘亦復異子美蘧蔭  
方丈室僅足容卧起吾意本扁舟陸居聊爾耳

又



祠官粟一囊不贍軀七尺前年蒙寬恩例許乞骸骨  
聯翩三兒子俱作鶴雀碧賦祿雖尚遠亦足慰衰白幅巾  
節簷下稱病謝來客從今門前路永掃車馬迹

又

舍北有漁磯下臨清溪流柳陰出朱橋蓮浦橫蘭舟  
蓴絲二三畝采掇拱晨羞魚蝦雖瑣細亦足贍吾州  
人生常如此安用萬戶侯綠蓑幸可買金印非所求

又

寓形百年中如臂屈伸頃少壯幾何時已復墮衰境老  
人喜自潔臨澗漱綠淨佛龕香事已僧鉢供煮餅山茶  
試芳嫩野果薦甘冷不學萬錢廚長魚取淮頴

又

巖石著幼輿風月思玄度老子放浪心常恐迫遲莫安  
得世外人握手相與語吾宗甫里公奇辭賦漁具高風  
邀不嗣徒有吟諷苦霜風吹短衣何山不堪住

又

久病卧江村髮白面鰲黑艱難念溫飽日夜積涓滴聚  
壤糞園桑荷鋤耘墾麥苟失一日勤農事深可惜小兒  
念乃翁卒歲共欣戚跂望明年春社雨泥一尺

又

德孫秀眉字慨然修初服枯腸貯詩書十飯九不肉成  
童將覓舉想見袍立鵠先澤儻未衰豈無五秉粟汝能記  
吾言併以告阿福閉門勿雜交一經萬事足

又

吾幼從父師所患經不明何嘗效侯喜欲取能詩聲亦  
豈劉隋州五字矜長城秋雨短檠夜掉頭費經營區區  
宇宙間捨重取所輕此身儻未死仁義尚力行

新治火閣

老子今朝喜有餘房櫳新畢得安居爐紅氍毹不出戶  
水落窻明常讀書浮蟻撇嘗入散後蹲鴟煨熟雪飛初  
頽然自適還終日殊勝隆中卧草廬

枕上作

無地容錐四壁空浩然亦未愴途窮夢回倦枕燈殘後  
詩在空堦雨滴中徂歲易成雙鬢禿故人難復一樽同

唐安萬里音塵絕誰為寒沙問斷鴻

張季長今年  
尚未通書

又

蕭蕭白髮卧扁舟死盡中朝舊輩流萬里關河孤枕夢  
五更風雨四山秋鄭虔自笑窮耽酒李廣何妨老不侯  
猶有少年風味在吳牋著句寫清愁

初睡起有作

喔喔曉雞鳴迢迢殘漏聲撥衾幽夢斷褰幌小窻明  
婢篝衣暖山童擁篲行老夫徐下榻負火聽鉶笙

示友

道向虛中得文從實處工凌空一鷲上赴海百川東  
骨真當勉規模不必同人生易衰老君等勿匆匆

述懷

宦遊輕用不貲身斂退今為省事人唾俟面乾元不校  
羹憂手爛更誰嗔時分鄰甌雙瓶綠

見張右史詩

永謝官倉

五斗陳最好莫秋溪上路柴門月色向人新

枕上

殘燈熠熠露螢明落葉蕭蕭寒雨聲堪笑衰翁睡眠少  
小詩常向此時成

又

斷香猶在夢初回燈似孤螢闔復開怪底詩情清徹骨  
數聲新鴈枕邊來

病足久敗遊山之興山中道人多見問戲作示之

病侵腰股作蹢跚九折途生布武間東姥自無緣見佛  
北公那有力移山買來芒屨真虛費扶上籃輿亦漸艱  
賴有春陵數峯在虛窻高卧看孱顏

舟中作

三百里湖新月時放翁艇子出尋詩城頭蜃閣烟將合  
波面虹橋柳未衰漁唱蒼茫連禹穴寒潮蕭瑟過娥祠  
祖龍虛負求仙意身到蓬萊却不知

追懷胡基仲

墓在雲門  
顯聖寺後



高潔胡徵士當時已絕無門庭謝殘客薪水斥常奴遺  
橐何由見英魂不可呼誰憐墓上草又是一年枯

十月八日九日連夕雷雨

雨聲聒耳不停點雲氣冒山殊未開敢恨終年惟裋褐  
但驚十月有奔雷牽蘿且復補茆屋飯豆何妨羹芋魁  
莫笑賦詩無傑句年來萬事學低摧

西村

今年四月天初暑買蓑曾向西村去桑麻滿野陂水深

遙望人家不知路再來桑落陂無水閉門但見炊烟起  
疑是羲皇上古民又恐種桃來避秦

感事示兒孫

人生讀書本餘事惟要閉門修孝弟畜豚種菜養父兄  
此風乃可傳百世我聞長安官道傍至今人指魏公莊

北方俗厚終可憇一字不識勤耕桑

長安有魏鄭公舊莊裔孫皆力耕無

識字者張芸  
史嘗過之

或遺木有雙實者香甚戲作

宣城繡瓜有奇香偶得並蒂置枕傍六根互用亦何常  
我以鼻嗅代舌嘗

十月

十月霜侵季子裘吾詩又送一年秋風回斷續聞樵唱  
木落參差見寺樓久已浮雲看富貴固應華屋等山丘  
江邊海際多幽致擬跨青驪處處遊

初晴

袖手東窗初日明殘編未負老書生不勝多病畏寒雨

正得一霜方快晴客戶餉羹提赤鯉

莊戶以雞魚之屬來餉謂之送羹

鄰家借碓擣新秔柴荆莫怪無車馬恰要無人識姓名

### 梅花

造物作梅花毫髮無遺恨楚人稱芳蘭細看終不近

又

五年作竹梢十年作梅枝九泉子廉子此語今誰知

宣廉

仲自言以五年之功作竹梢十年之功作梅枝

又

欲與梅為友常憂不稱渠從今斷火食飲水讀仙書

又

春信今年早江頭昨夜寒已教清徹骨更向月中看

又

江上梅花吐山頭霜月明摩挲古藤杖三友可同盟

對酒戲詠

淺傾西國蒲萄酒小嚼南州豆蔻花更拂烏絲寫新句  
此翁可惜老天涯

冬夜

北斗挂屋角西風驚雁羣  
山寒歲云暮人靜夜中分  
酒滴糟牀雨香生紙帳雲  
眼花書課減舊學失鋤耘

冬晴稍理舊學有感於懷

天公元不吝光陰付與書生  
遂本心老已為民猶問學  
向雖作吏半山林百年斷橐傳  
三世一日晴窗抵萬金  
努力更思恢道術酒杯雖把不須深

葺小圃及東齋

山翁作園沼安樂及禽魚凡草猶當養芳蘭可得鋤初  
非治一室亦豈愛吾廬草境雖云迫心期故有餘

讀經示兒子

通經本訓詁講字及聲形未盡寸心苦已鎖雙鬢青懼  
如臨戰陣敬若在朝廷此是吾家事兒曹要細聽

出遊不果

天柱峰前水亂流石碁渡口葉飛秋青鞵已是前身事  
縱有籃輿亦嬾遊

夢行秦晉間有作

夜店紬衾暖晨厨粟飯香  
驢肩雙酒榼童背一琴囊  
冰坼河聲壯郊平塔影長  
古今均夢境不用弔興亡

聞雞鳴自警

為善孳孳進德新雞鳴每念舜何人  
此身彊健直須勉  
一日會當無此身

嘲子聿

講誦多吳語鉤提學佐書  
夜分燈未徹晨起髮慵梳  
飽



食園官菜少留溪友魚能憐乃翁病身自舉籃輿

馬上口占

大耋光陰豈自期即今堪喜亦堪悲關河隔絕初心負  
憂患侵尋舊學衰羸馬步溪孤店路栖鴟滿樹曉霜時  
憑鞍殘夢悠然覺又得浮生一首詩

幽居

莫笑茅茨陋岡形接卧龍連娟鏡湖月縹緲寶林鍾間  
約魚池釣眠聽碓舍春他年好事客過此訪遺蹤

感事

陋巷何須歎一瓢  
朱門能守亦寥寥  
衲衣先世曾調鼎  
野褐家聲本珥貂  
若悟死生均露電  
未應富貴勝漁樵

千年回首俱陳跡  
不向杯中何處消

沈義倫丞相裔孫為僧劉仁瞻侍中裔孫

為通人皆孤身死紹興中二公之後皆絕

初寒

逐祿天涯半此生  
明時寬大許歸耕  
山圍魚市寒無色  
雨掠蓬窻夜有聲  
白髮青燈身潦倒  
殘蕪落葉歲崢嶸

爾來有喜君知否買得烏捷萬事輕

寄題季長飾菴

近詔還中秘新文記飾菴主盟君勿讓賈勇我何堪  
木落山容瘦雲齊雪意酣何由共杯酒把蟹擘黃甘

對食書媿

連年寬水旱天若相懸車粗有芋魁豆併忘熊掌魚  
先生飯不足賢者食無餘老我知何幸晨盤厭羹蔬

戲題酒家壁

漫道江南倚寺樓  
豈知烟雨弄扁舟  
并刀不剪清愁斷  
楚練難縻白日留  
湖上采蘋甘似蜜  
街頭買酒滑如油  
金丹九轉何時畢  
且對梅花一醉休

又

送了春歸又送秋  
人間隨處寄悠悠  
百年此際成遺老  
萬里當時賦遠遊  
筆力日衰慙陣馬  
江天歲晚狎冥鷗  
清狂自笑無時歇  
又犯新寒上市樓

又

朋舊存亡寂不聞  
年年江海愴離羣  
時平酒價賤如水  
病起老身閒似雲  
飽食每慙荒舊學  
後生誰可付斯文  
案頭清鏡塵昏盡  
殘髮知添白幾分

予老甚髮乃  
有未白者

十月二十八日夜風雨大作

風怒欲拔木  
雨暴欲掀屋  
風聲翻海濤  
雨點墮車軸  
拄門那敢開  
吹火不得燭  
豈惟漲溝谿  
勢已卷平陸  
辛勤執宿麥  
所望明年熟  
一飽正自難  
五窮故相逐  
南鄰更可念  
布被冬未贖  
明朝甑復空  
母子相持哭

夜寒然火有感

墮巢拾槁枝微火吹孤螢風火一相得須臾細烟青暖  
焰遂騰上凜冽回玄暝君看金鼎火其初亦熒熒至理  
存橐籥奇功挾風霆笑談縛三彭指顧役六丁超然出  
塵世豈獨制頽齡勸君勿虛死萬過誦黃庭

農事休小葺東園十韻

歸老心常逸新寒體亦康幸當農事隙稍治舊園荒翦  
闢西山出縈回北徑長作欄扶弱蔓換土植孤芳霜霰

簞簞碧風烟辟荔蒼蝶來翻小翅鳥下嚙幽吭疏剔巖  
泉集耘鋤藥草香溪藤栽酒榼番錦製詩囊坐久雲生  
石歸遲月滿廊人間胡不樂拔宅笑君房

開東園路北至山脚因治路傍隙地雜植花草

清溝東畔翦蓁菅雖設柴門盡日關遠引寒泉成碧沼  
稍通密竹露青山幽花泣露開仍落好鳥穿林去復還  
更上橫岡吾所愛小兒試覓屋三間

又

魏野林逋久已仙  
放翁寄傲鏡湖邊  
松根偃蹇支琴石  
巖竇潺湲洗藥泉  
半祿掃空雖在我  
殘年健甚豈非天  
遙遙桑苧家風在  
重補茶經又一編

又

憶自南昌返故鄉  
移家來就鏡湖涼  
鷗雛養得冲霄漢  
松樹看成任棟梁  
手版永拋貧亦樂  
肩輿時上老何妨  
平郊東望江城近  
隱隱青笳送夕陽

又



父子追隨一笑傾東園東畔路初成夾栽芳草如繩直  
前出籬門似砥平春近野梅香欲動雨餘溝水細無聲  
今朝有意誰能識不用人扶亦自行

又

病眼逢人每嬾開正須此地洗氛埃數枝梅向林梢出  
一脈泉從嶺背來藤杖有時緣石磴風爐隨處置茶杯  
殘軀自笑如春草又喜天邊斗柄回

又

避俗從來恨不深  
家園栽種偶成陰  
西連幾曲菖蒲澗  
東接無窮簷蔔林  
烏桕谷寒迎野步  
金沙泉冷洗塵襟  
清音可寫吾詩拙  
他日君來試抱琴

連日治圃至山亭又作五字

雞圃課僮奴  
爭前不待呼  
水泉經雨壯  
蓊莽得霜枯  
高樹鳴雙鵲  
清池下兩鳬  
莫年惟樂此  
餘念一毫無

又

富貴尋常事  
天奚獨汝慳  
十分教嬾拙  
百倍與清閒  
故

鶴雲千頃釣魚溪一灣此詩雖信筆他日不須刪

又

好竹千竿翠新泉一勺冰殘蕪襯落日老木上寒藤細磴歌難過危欄曲可憑歸時忽已暮點點數漁燈

又

門開度略約路盡上陂陀農隙閒耕犢樵歸起醉歌青煙舞鸞鳳白石伏龜鼉剝有筇枝興窮冬氣已和

寒夜

敗屋頽垣對短檠課書聊自限三更蕭條草木寒無色  
窸窣狐狸出有聲半盃濁醪求火暖一篇疑義與兒評  
未須遽起窮愁歎明日尋梅雪正晴

掩卷有感

少年雖讀書每恨性疎嬾中年頗自勵已歎歲月短學  
不到聖賢此意終未滿甑空不憂飢衣垢不思浣區區  
管晏事端可付一莞羸然八十翁風雪卧空館

閒遊

出雜羊牛牧歸隨鳥雀栖聊持數匙飯就乞半盂齋浩  
蕩陵原野崎嶇歷澗溪閒遊豈不好客意自淒淒

野寺

閒行入野寺僧飯鼓具鏜慘慘風勞面暉暉日滿廊去  
來元自在賓主兩相忘却下山坡路樵歌出隴長

三江

三江郡東北古戍鬱嵯峨漁子船浮桒更人鼓應鼉年  
豐坊酒賤盜息海商多老我無豪思悠然寄醉歌

讀老子

放翁晨起坐龜堂古銅匱燒海南香臨目接手精思牀  
身如槁木心如牆八十一章獨置傍徐起開讀聲琅琅  
恍然親見古伯陽袂屬關尹肩庚桑孰能試之出毫芒  
末俗可復躋羲皇陰符偽書實荒唐雅川金丹空有方  
人生忽如瓦上霜勿恃強健輕年光

新泉

掃石蔭雙松岸巾穿萬竹爾來又一竒巖泉寒可掬

泉可淪茗就泉可洗藥楚人曾未知但謂纓可濯

風雨

七十年來樂太平白頭父子事春耕因思世事悲身事  
更聽風聲雜雨聲四海故人強半死一襟清淚對誰傾  
新春要覓燒丹處不住青城住赤城

題菴壁

萬疊青山繞鏡湖數椽自愛野人居風來松度龍吟曲  
雨過庭餘鳥迹書小疾不妨尋酒去豐年偶及挂冠初

有金可散還多事四壁蕭然計未疎

又

衰髮蕭疎雪滿巾君恩乞與自由身身并猿鶴為三友

一作家託烟波作四鄰十日風號未成雪一年梅發又

催春漁舟底用勤相覓本避浮名不避人

讀仙書

與世已如風馬牛松風終日聽颼颼一爐丹熟定不死  
半甌酒香安得愁腰帶羈前秋萬頃香爐峯下水交流



人間事事皆須命惟有神仙可自求

讀淵明詩

淵明甫六十遽覺前途迤作詩頗感慨自謂當去客吾  
年久過此霜雪紛滿幘豈惟僕整駕已迫牛負輶奈何  
不少警玩此白駒隙傾身事詩酒廢日弄泉石梅花何  
預汝一笑從渠索顧以有限身兒戲作無益一牀寬有  
餘虛室自生白要當棄百事言從老耄役

寒夜枕上

屋老霜寒睡不成  
迢迢漏鼓過三更  
烏啼林外月初上  
犬吠水邊船夜行  
市有歌呼知歲樂  
亭無枹鼓喜時平  
吾詩欲寫還慵起  
卧看殘燈翳復明

新晴出門閒步

一夜風號作快晴  
披裘扶杖出門行  
青山繞舍雪封盡  
丹葉滿街霜染成  
廢寺僧寒多晏起  
近村農惰闕冬耕  
窮人旋畫膨脝計  
自買蹲鴟煮糝羹

聞笛

雪飛數片又成晴透瓦清霜伴月明一曲忽聞高士笛  
臨窻和以讀書聲

鳴禽

小徑霜泥結凍時幽入十日廢筇枝新晴池館春來早  
簾外鳴禽聖得知

食晚

日高得米喚兒舂苦雨園蔬久闕供省事家風君看取  
半飢半飽過殘冬

午坐戲詠

貯藥葫蘆二寸黃煎茶橄欖一甌香  
午窗坐穩摩癡腹  
始覺龜堂白日長

戲詠鄉里食物示鄰曲

山陰古稱小蓬萊青山萬疊環樓臺  
不惟人物富名勝  
所至地產皆奇瓌茗芽落磴壓北苑  
藥苗入饌逾天台  
明珠百舸載芡實火齊千擔裝楊梅  
湘湖蓴長涎正滑  
秦望巖生拳未開箭萌蟄藏待時雨  
桑葦菌蠢驚春雷

稷花蒸煮醯醢醬薑茁披剝醃糟醅細研覈粟具湯液  
濕裹山贛供炮煨老饒自覺筆力短得一忘十真堪咍  
從今置之勿復道一瓢陋巷師顏回

歲暮貧甚戲作

得米還求澗底薪始知天地有窮人年開八秩寧賒死  
官及三兒不救貧藥盡無如醫偃蹇囊空那辨酒逡巡  
柳條萱草添愁思不似尋常見早春

汪叔潛教授挽辭

江南有奇士英譽早飛騰未見心先契相從氣倍增時  
煩問字酒屢供讀書燈下榻延徐孺同舟得李膺百年  
期永好一旦失良朋稚子初何取龍門亦許登流光疾  
於鳥舊社冷如冰欲作千言誄衰遲媿未能

汪給事太夫人程氏挽辭

夫人內外二族享壽八九十者至二十餘人

爵色恩榮盛鄉閭譽望尊儒科傳累葉上壽萃高門阡  
茂新栽栢堂餘舊樹萱故民何以報沾灑望秋原

太恭人諭氏挽辭

恭人生於紹聖二年沒於慶元六年壽九十六自太孺人至太

恭人皆  
特恩封

耄齒人誰及高門世共榮  
始終膺備福釋老遇昇平  
綸綍褒嘉事鄉閭惻愴情  
吾詩儻傳世亦足見平生

路乾

日曬霜融步步泥  
旬餘不到石泉西  
連朝和暖得乾路  
喚取鄰翁來杖藜

寒夜

閉戶歲云莫翻書夜向闌  
足僵知火盡目鈍覺燈殘  
躍

浦魚驚獺穿林犬逐獶三年納微祿無媿得心安

乍晴至園中

藥笈漁竿每自隨  
枯筇短帽恰相宜  
投林但有窮猿喜  
伏檻元無老驥悲  
巖溜甘寒通碧沼  
野梅清絕隔疎籬  
放翁老甚情懷嬾  
那辦題詩寄所思



劔南詩彙卷四十四